

մունս¹, յարգելով եւ անմոռաց զարմանալով զլուսաւոր եւ զանգայթ բանին² բղիւմս, ի հրապարակս եւ ի փողոցս յայս եւեթ հռչակելով առ միմեանս խայտացեալք՝ ի կոր կործանեցան, եւ այնուհետեւ սկսան յղանալ զոխակալութիւնս եւ ծնանել զնախանձ: 157 Իսկ յորժամ ի դոսա այնպիսի առաւելաւ չարականութիւն՝ լռեալ արգելաւ բանս, եւ ոչ թէ յասողէն,- քա՛ն լիցի, քանզի անգեղջ է շնորհն, եւ անպակաս են պարգեւքն,- այլ ի դոցանէ, զի մի՛ լուիցեն զբան փրկութեան իւրեանց: 158 Առ որս կատարի բան Յոգւոյն, որ ասէ, թէ *Տաց ձեզ³ սով, ո՛չ սով հացի, եւ ո՛չ ծարաւ ջրոյ, այլ սով⁴ լսել զպատգամս Տեառն^ա*:

159 Սահեցուցեալ զմտածութիւնսն ի բազում յաճմունս⁵ եւ զայս եւս յաւելալ յայլ չարախորհութիւնսն՝ ասէին. «Այդ⁶ գիր ոչ կարդայ, եւ զընթերցուածն այնպէս ասէ անսայթաք՝ որպէս թէ գրոցն»: 160 Եւ յայս ոչ հայեցան գիտել, թէ որք քաջ գիտեն՝ զսաղմոսն Դաւթի պաշտել միայն պիտոյ է ի ժամուն անսխալ, եւ ոչ միշտ զգիրսն ի ձեռին ունելով՝ խաւսել զայլայլս իբրեւ զբանդագուշեալս⁷: 161 Իսկ մեր ⁸երանելի վարդապետքն զամենայն զկտակարանս եկեղեցւոյ երիցս եւ չորիցս ուսուցեալ մեզ ի սկզբանէ մինչեւ ի կատարած գրոցն՝ համարս պահանջէին ի մենջ զնոյնս, եւ իբրեւ զԴաւթի սաղմոսն⁹ պաշտել մեզ հարկաւորէին: 162 Իսկ այժմ յոլովք ի լիրբ մախողաց՝ եւ զանուանս անգամ եւ կամ զբանաւնութիւնս կանոնեալ¹⁰ եկեղեցական գրեւոյ հազիւ կարեն գիտել, եւ գրգռութեամբ նախանձարկու դիւին, նստեալք առ միմեանս՝ լու ի լու այլոցն զինչպէտս խաւսին:

163 Եւ արդ՝ զի՛նչ եւս ասեմ. զի չէ բաւական ժամանակս՝ համարելոյ զանթիւ յիս ի նետաձգութենէ¹¹ թշնամոյն զվերս, զոր աւուր աւուր եւ ժամու ժամու ընկալեալ վտանգիւ՝ տանէի ամենայնի ի հարկէ: 164 Զանգի եւ կծկեալ, որպէս սաստիկ եւ պինդ կապով¹², քաղցր եւ ամենահեշտ քո

1 Ատ. յորդորմունս-ը ուղղագրել էր յորդութիւնս Վ. յարդարմունս

2 Վ. զանգութ բանիս

3 Վ. չիք ձեզ

4 ՏՏ. չիք ոչ սով հացի, եւ ոչ ծարաւ ջրոյ, այլ սով

ա Ամ. Ը 11

5 ՁԱտ. յաճմունս. Վ. աճմունս

6 ԲԳտ. եկթադրում են այրոյ այդ. թերեւս՝ արդ

7 Ձ. զբանդագուշեալս

8 Վ. երանելի հարապետքն... զկտակարան

9 Վ. զնոյն, եւ իբրեւ զսաղմոսն Դաւթի

10 ՁՎ. զբանոնութիւն կանոնել. Ատ. նոյնպէս կանոնել

11 Վ. յիս նետաձգութենէ

12 ՁԱտ. ի սաստիկ եւ պինդ կապով. Վ. կալով. ԲԳտ. ուղղագրել են ի սաստիկ եւ պինդ կապոյ